

Adaptación do Regulamento dos Estudos de Terceiro Ciclo da USC ao disposto no Real Decreto 56/2005, de 21 de xaneiro, polo que se regulan os estudos universitarios oficiais de posgrao.

Aprobada polo Consello de Goberno o 18 de xullo de 2005

O Real Decreto 56/2005, do 21 de xaneiro, polo que se regulan os estudos universitarios oficiais de Posgrao, veu modificar o procedemento de obtención do título de doutor regulado polo Real Decreto 778/1998, do 30 de abril, e inicia un período transitorio no que necesariamente deben ter coexistencia ambos sistemas. Ademais, a disposición transitoria primeira do RD 56/2005 dispón a entrada en vigor o 26 de xullo de 2005 das novas normas relativas a elaboración, tribunal, defensa e avaliación da tese de doutoramento. Polo tanto, cómpre adaptar o Regulamento dos Estudos de Terceiro Ciclo da USC ás esixencias da nova normativa.

En consecuencia, o Consello de Goberno, reunido o 18 de xullo de 2005, ACORDA:

PRIMEIRO.- *Regulación dos estudos de terceiro ciclo*

1. En tanto non se produza a efectiva implantación dos estudos universitarios oficiais de posgrao por aplicación do Real Decreto 56/2005, do 21 de xaneiro, os estudos de doutoramento da Universidade de Santiago de Compostela continuarán rexéndose polas disposicións do Real Decreto 778/1998, do 30 de abril e o Regulamento dos Estudos de Terceiro Ciclo da USC aprobado pola Xunta de Goberno o 7 de abril de 2000, coas modificacións posteriores. A admisión de alumnos nos estudos de terceiro ciclo da USC realizarase nos programas de doutoramento aprobados, e segundo as normas que lles sexan de aplicación transitoria durante a súa vixencia.

2. Non obstante o disposto no apartado anterior, o réxime relativo á elaboración, tribunal, defensa e avaliación da tese de doutoramento dos estudantes que inicien ou teñan iniciado os seus estudos de terceiro ciclo a partir do 26 de xaneiro de 2005 será o establecido nos seguintes artigos, de conformidade coa Disposición transitoria primeira do RD 56/2005, do 21 de xaneiro.

SEGUNDO.- *Organización e xestión dos estudos de terceiro ciclo*

1. Correspóndelle á Vicerreitoría de Terceiro Ciclo e Extensión Docente, e no seu ámbito ao Centro de Posgrao, Terceiro Ciclo e Formación Continua, a coordinación e supervisión dos estudos de terceiro ciclo na USC.

2. Correspóndelle á Secretaría Xeral, e no seu ámbito ao Servizo de Xestión Académica, a xestión académica dos estudos de terceiro ciclo.

3. Correspóndelle aos departamentos e institutos de investigación a organización dos estudos de terceiro ciclo, no marco dos programas de doutoramento aprobados polo Consello de Goberno. Os departamentos e institutos serán os órganos responsables dos programas de terceiro ciclo aos efectos do disposto no RD 56/2005, do 21 de xaneiro.

4. Correspóndelle á Comisión de Doutoramento prevista no artigo 140 dos Estatutos da USC a competencia de aprobar, ou se é o caso propoñer, os cursos,

seminarios ou outras actividades dirixidas á formación investigadora dos doutorandos, así como a de realizar os actos de tramitación das teses de doutoramento que se especifican no Regulamento de Estudos de Terceiro Ciclo e na presente normativa.

A Comisión de Doutoramento elixida polo Consello de Goberno terá a consideración da comisión referida nos artigos 11 a 13 do Real Decreto 56/2005, do 21 de xaneiro, sen que esta atribución implique a súa consideración como a comisión de estudos de posgrao competente para propoñer programas de posgrao oficial de conformidade co artigo 4.2 do devandito Real Decreto.

TERCEIRO.- *Modificación dos artigos 30 a 45 do Regulamento dos Estudos de Terceiro Ciclo da USC*

Modifícanse os artigos 30 a 45 do Regulamento dos Estudos de Terceiro Ciclo da Universidade de Santiago de Compostela, de xeito que teñan a seguinte redacción:

Art. 30 *Elaboración da tese*

1. Durante a etapa de tese realizaranse o traballo ou traballos de investigación dirixidos polo director ou codirectores de tese que culminen coa elaboración da tese de doutoramento.
2. A tese de doutoramento consistirá nun traballo orixinal de investigación **relacionado cos campos científico, técnico ou artístico do programa de doutoramento cursado polo doutorando.**
3. A tese de doutoramento redactarase, como norma xeral, en lingua galega ou castelá excepto as teses das filoloxías modernas, que poderán redactarse nas súas linguas correspondentes. Non obstante a Comisión de Doutoramento poderá autoriza-la súa redacción noutro idioma, logo do informe do departamento ou instituto universitario, sempre que se garanta que o tribunal estará en condicións de xulgala. No caso de que a tese se redacte nunha lingua distinta do galego, castelán ou portugués, esta deberá incluír un anexo, encadernado no propio volume da tese, contendo un resumo de, alomenos, tres mil palabras en galego ou castelán.
4. Os exemplares da tese de doutoramento deberán estar encadernados e levarán unha páxina no seu comezo na que conste: a) o visto e praxe do director ou codirectores da tese; b) cando o director ou os codirectores non sexan doutores do departamento ou instituto universitario, o visto e praxe do titor; c) a sinatura do doutorando. As sinaturas correspondentes ós apartados, a) e, de se-lo caso, b) supón a autorización por parte do asinante para a presentación da tese á admisión previa.

Art. 31 *Modificación do proxecto de tese*

1. Durante o desenvolvemento da etapa de tese o alumno poderá solicitar ó director do departamento ou do instituto universitario correspondente a modificación total ou parcial do seu proxecto de tese e/ou o cambio de dirección ou, de se-lo caso, de titor.
2. A solicitude de cambio de dirección deberá contar coa aceptación do novo director ou directores, así como dos anteriores que continúen na dirección
3. Para o cambio de titor, a solicitude incluírá o visto e praxe do novo titor.

4. A solicitude de modificación do proxecto de tese deberá ir acompañada do novo proxecto, e ambos deberán contar co visto e prace do director ou codirectores de tese e, de se-lo caso, do titor.

5. As solicitudes dos cambios citados serán consideradas polo consello do departamento ou instituto universitario correspondente para a súa aprobación, se procede. Non obstante, nos casos recollidos nos apartados 2 e 3, o director do departamento obterá informes dos directores ou titores previos para a súa consideración polo citado consello. Adoptada a resolución correspondente, o director do departamento ou do instituto universitario fará chegar ó CPTF unha relación das modificacións ou cambios aprobados.

Art. 32 *Presentación da tese no departamento*

Rematada a elaboración da tese de doutoramento, o doutorando **fará o depósito da mesma** no departamento ou instituto universitario, achegando a seguinte documentación:

- a) Un exemplar da tese de doutoramento, asinado polo doutorando, polo director ou codirectores e, de se-lo caso, polo titor. Este exemplar non poderá ser substituído unha vez efectuado o depósito.
- b) **Informe favorable do director da tese.**
- c) Curriculum vitae do doutorando.
- d) Relación das patentes solicitadas e dos libros, artigos ou actas publicados, ou en proceso de publicación, orixinados polos traballos de investigación que culminaron na elaboración da tese.

Art. 33 *Admisión previa a trámite da tese*

1. Á vista **do depósito** dunha tese de doutoramento, o director do departamento ou instituto universitario comunicarao a tódolos seus membros doutores e poñeraa á súa disposición, na secretaria do departamento ou instituto universitario, para o seu exame, durante un prazo mínimo de 5 e máximo de 20 días lectivos. Os membros doutores do departamento ou instituto universitario poderán remitir **á comisión de doutoramento** as consideracións que estimen oportunas acerca do contido da tese de doutoramento, **sen prexuízo de facelas chegar tamén ao director do departamento ou instituto universitario.**

2. Rematado o prazo ó que fai referencia o apartado anterior, o director do departamento ou instituto universitario convocará o seu consello, nun prazo máximo de 10 días lectivos para aprobar, se procede, a admisión previa a trámite da tese e, de se-lo caso, o centro ó que se vincula esta para os efectos de premio extraordinario de doutoramento. No dito consello o director do departamento ou instituto universitario poñerá a disposición dos seus membros as consideracións acerca do contido da tese que se recibiran.

3. Unha vez aprobada a admisión previa a trámite da tese de doutoramento, o director do departamento ou instituto universitario remitirá á Comisión de Doutoramento: a) unha certificación do acordo do consello do departamento ou instituto universitario ó respecto; b) un informe razoado sobre o centro ó que se vincula á tese para os efectos de premio extraordinario de doutoramento; c) o exemplar da tese así como os documentos mencionados no artigo 32.b e 32.c, **e toda a documentación que**

o proceso de avaliación da tese xerara; d) unha proposta de expertos na materia que poidan formar parte do tribunal encargado de xulgal.

4. No caso de que a admisión previa da tese non sexa aprobada polo consello de departamento ou instituto universitario, este emitirá un informe razoado da decisión tomada e remitirao ó solicitante.

Art. 34 *O tribunal xulgador da tese*

O tribunal xulgador dunha tese de doutoramento estará formado por cinco membros titulares e dous membros suplentes. Na súa composición deben respectarse os seguintes requisitos:

a) Tódolos membros deberán ser doutores **e con experiencia investigadora acreditada**. Os profesores pertencentes ós corpos docentes universitarios poderán formar parte dos tribunais aínda que estean en situación de excedencia ou xubilados.

b) Do total de membros titulares e suplentes, non poderá haber máis de dous do mesmo departamento, **instituto ou órgano responsable do programa oficial de posgrao cursado polo doutorando** nin máis de tres da mesma universidade.

c) En ningún caso, poderán formar parte do tribunal o director ou codirectores da tese nin, de se-lo caso, o titor, salvo nos casos de teses presentadas **no marco de acordos bilaterais de cotutela con universidades estranxeiras que así o teñan previsto**.

Art. 35 *Proposta do tribunal*

1. O consello do departamento ou instituto universitario no que unha tese de doutoramento obtivera a admisión previa a trámite, oído o director ou os codirectores de tese, ou, de se-lo caso, o titor, elaborará unha proposta de dez doutores especialistas na materia a que se refire a tese ou noutra que garde afinidade con ela. A dita proposta irá acompañada dun informe razoado sobre a idoneidade de todos e cada un dos membros propostos para xulga-la tese. Na elaboración da proposta teranse en conta as características do tribunal xulgador recollidas no artigo anterior.

2. O director do departamento ou instituto universitario remitirá a proposta á Comisión de Doutoramento e solicitará desta a designación do tribunal que ha xulga-la tese de doutoramento.

Art. 36 *Depósito da tese*

A Comisión de Doutoramento, unha vez recibida a documentación á que fai referencia o artigo 33.3, considerará a tese de doutoramento depositada, e informará a tódolos departamentos e institutos universitarios da súa recepción. A Comisión de Doutoramento e os departamentos e institutos universitarios garantirán a difusión e publicidade da realización do depósito da tese de doutoramento indicando o lugar onde esta pode ser consultada. Durante un prazo de 15 días lectivos, calquera doutor poderá examina-lo exemplar da tese en depósito e, de se-lo caso, dirixir por escrito ó presidente da Comisión de Doutoramento as consideracións que estime oportunas acerca do contido da tese de doutoramento.

Art. 37 *Admisión a trámite da tese*

Rematado o prazo de depósito, a Comisión de Doutoramento dispoñerá do tempo necesario para decidir acerca da admisión da tese de doutoramento a trámite ou se, pola contra, procede retirala. Esta decisión basearase nos escritos con consideracións acerca do contido da tese recibidos, e nas consultas ó departamento ou instituto universitario e ós especialistas que considere oportuno realizar.

Art. 38 *Nomeamento do tribunal*

Unha vez admitida a tese a trámite, a Comisión de Doutoramento nomeará os cinco membros titulares e os dous suplentes do tribunal que a vulgará, de entre os especialistas propostos polo departamento ou instituto universitario, oídos, se o considera oportuno, o director ou codirectores da tese e os especialistas que a Comisión estime. Entre os membros designados nomeará un presidente e un secretario do tribunal.

Art. 39 *Informes dos membros do tribunal*

1. Nomeado o tribunal, a Comisión de Doutoramento comunicará a súa composición ó director do departamento ou instituto universitario e ó doutorando. Dentro dos quince días seguintes á recepción da dita comunicación, o doutorando fará chegar **ao departamento ou instituto sete exemplares da tese e dos documentos mencionados no artigo 32.c) e 32.d), que o departamento ou instituto remitiralles aos membros do tribunal.**

2. Así mesmo a Comisión de Doutoramento remitirá unha copia do nomeamento a cada un dos membros do tribunal, e comunicaralles que dispoñen de un mes para enviar á Comisión de Doutoramento un informe individual e razoado no que se valore a tese e conste explicitamente a súa aprobación ou non para que a tese sexa defendida publicamente. Potestativamente, a Comisión de Doutoramento poderá solicitar ós membros do tribunal nomeados que os seus informes se axusten a un modelo normalizado ou que, ocasionalmente, inclúan respostas a preguntas concretas acerca do contido da tese de doutoramento.

3. A remisión do informe implica a aceptación como membro do tribunal.

Art. 40 *Autorización da defensa pública da tese*

Á vista dos informes ós que se refire o artigo anterior, a Comisión de Doutoramento resolverá se procede ou non a defensa pública da tese. Antes de resolver, o director ou codirectores de tese poderán ser chamados pola Comisión de Doutoramento co fin de obter a información que se considere oportuna para fundamentar a decisión. No caso de resolución negativa, a Comisión de Doutoramento acordará a interrupción dos trámites da defensa pública da tese e remitirá ó doutorando unha copia da resolución motivada que expresará as observacións e razóns que xustifiquen a decisión e, de se-lo caso, a canle oportuna para emendar os defectos observados.

Nos supostos de non-autorización da defensa da tese, a comisión deberálles comunicar por escrito ao doutorando, ao director da tese e ao departamento ou instituto responsables do programa de doutoramento, as razóns da súa decisión.

Art. 41 *Momento e lugar da defensa pública da tese*

Aceptada a defensa pública da tese pola Comisión de Doutoramento, **o presidente do tribunal, de acordo co director do departamento ou instituto universitario, convocará o acto de defensa da tese. O secretario do tribunal comunicará á comisión, ao doutorando e ao departamento ou instituto, cunha antelación mínima de quince días naturais á súa celebración, a data, hora e lugar da defensa. O departamento ou instituto fará pública a convocatoria e comunicaraa ao CPTF.**

Art. 42 *Matrícula da tese*

Seguidamente, e logo de que a Comisión de Doutoramento autorice a defensa pública da tese, o doutorando deberá efectua-la matrícula correspondente no CPTF coa antelación suficiente.

Art. 43 *Actas*

1. Una vez feita a matrícula, a Comisión de Doutoramento remitirá ó secretario do tribunal, a través do director do departamento ou instituto universitario, os documentos que deberán ser cubertos no acto de defensa da tese de doutoramento: a) acta de constitución; b) acta da sesión; c) a ficha do resumo da tese de doutoramento; d) o sobre oficial para recolle-los informes confidenciais sobre a tese para os efectos do premio extraordinario de doutoramento.

2. Concluído o acto de defensa pública da tese, o secretario do tribunal devolverá, persoalmente ou a través do director do departamento ou instituto universitario, a documentación recollida no apartado 1, debidamente cuberta, ó CPTF para o seu arquivo e documentación.

Art. 44 *Defensa pública da tese*

1. O acto de mantemento e defensa da tese terá lugar en sesión pública.

2. A defensa da tese de doutoramento consistirá na exposición polo doutorando do labor preparatorio realizado, **a metodoloxía**, contido da tese e conclusións, facendo especial mención das súas contribucións orixinais.

3. Os membros do tribunal deberán expresa-la súa opinión sobre a tese e poderán formular cantas cuestións e obxeccións consideren oportunas, ás que o doutorando haberá de contestar.

4. Así mesmo, os doutores presentes no acto poderán formular cuestións e obxeccións, e o doutorando responder, todo isto no momento e forma que sinale o presidente do tribunal.

Art. 45 *Cualificación*

1. **Rematada a defensa da tese de doutoramento, cada membro do tribunal formulará por escrito unha valoración sobre ela.**

2. **O tribunal emitirá a cualificación global que finalmente lle concede á tese de acordo á seguinte escala: non apto, aprobado, notable e sobresaliente. O**

tribunal poderá outorgar a mención de “cum laude” se a cualificación global é de sobresaliente e emiten, en tal sentido, o voto favorable, polo menos, catro dos seus membros.

3. O tribunal pode facer constar no expediente calquera valoración singular da tese, que no seu caso será tida en conta para outorgar mencións honoríficas ou premios.

CUARTO

1. O presente acordo entrará en vigor o 26 de xullo de 2005.
2. Quedan derogadas canta disposicións de igual ou inferior rango se opoñan ao presente acordo.